

inspirasie

leiersgids vir

# Ester

leef met moed in 'n uitdagende wêreld



Diane Averill, Diane Dykgraaf,  
Sam Huizenga en Paul Faber

 Bybelkor

Oorspronklik uitgegee deur Faith Alive Christian Resources. Kopiereg © 2010 Faith Alive Christian Resources, Kalamazolaan SE 2850, Grand Rapids, MI 49560, VSA. Kopiereg Afrikaanse weergawe © 2012 Bybelkor. Bybelkor is 'n afdeling van Bybel-Media, Privaatsak X5, Wellington 7654. [www.bybelmedia.co.za](http://www.bybelmedia.co.za). Alle regte voorbehou. Met die uitsondering om hierdie materiaal van [www.bybelmedia.co.za](http://www.bybelmedia.co.za) af te laai vir gebruik om die Bybelstudie *Ester – Leef met moed in 'n uitdagende wêreld* (© 2012 Bybelkor) as groepleier aan te bied, mag geen gedeelte van hierdie dokument sonder die skriftelike toestemming van die uitgewer gereproduseer of in enige vorms of langs enige elektroniese of meganiese manier weergegee word nie, hetsy deur fotokopiëring of enige ander stelsel van inligtingsbewaring.

# Terwyl jy voorberei om die groep te lei

**J**y het 'n belangrike taak – óf jy nou die enigste groepleier vir hierdie Bybelstudie is en óf die groep onderling beurte neem om die Bybelstudie te lei. Doen dus voorbidding vir jou groeplede en vir nuwe mense wat die Here mag lei om by julle groep tydens hierdie Bybelstudie aan te sluit.

Hierdie studiemateriaal is ontwikkel om hoofsaaklik self gelei te kan word – dit beteken dat groepe in staat sal wees om hoofsaaklik op hulle eie deur die materiaal te kan werk. By sommige gedeeltes van die lesse kan dit egter help om van die groepleier se notas in te sluit. Ons hoop dus dat jy hierdie materiaal vir groepleiers sal leer ken en dit gebruik wanneer jy voorbereiding doen om die groep te lei.

Die vernaamste doelwit van die groep se byeenkoms is om nader aan God en aan mekaar te groei, om in die geloof gebou te word sodat elkeen ook geestelik kan groei om 'n getuie vir die Here te wees (Hand 1:8) – en so God se liefde en die evangelie met ander te deel.

## **Algemene besprekingswenke en grondreëls vir groepleiers**

- In hierdie Bybelstudie is alle vrae wat verband hou met die onderwerp aanvaarbaar. Hierdie studiestyl is daarop gemik om die Bybel te

ontdek en nooi deelnemers uit om 'n styl te ontwikkel wat vrae oor die teks vra soos wat hulle meer van die Here leer en nader na Hom toe groei.

- Geen vorige studie van die Bybel is noodsaaklik nie. As die Bybel vir sommige of almal van jou groep 'n nuwe ervaring is, sal jy miskien bykomende tyd saam met hulle wil spandeer sodat hulle nie afgeskeep of nie in staat voel om deel te neem nie. Dit beteken dat jy die tydsduur van julle byeenkoms 'n bietjie moet aanpas of eenvoudig meer byeenkomste moet inruim om saam deur die materiaal te werk. Die belangrikste is dat die nuweling in die kleingroep aangemoedig moet word, na hulle geluister moet word, versorg moet word en ruim geleentheid gebied moet word om geestelik te groei. Deel hierdie besorgdheid indien nodig met die lede wat reeds met die Bybel vertrou is en moedig elkeen aan om saam te werk om die nuweling te help om in die geloof te groei.
- Soos wat jy die groeplede leer ken, sal jy 'n aanvoeling ontwikkel hoe veel jy op vrae moet hamer wat om persoonlike voorbeelde en reaksies vra. Wees oop vir die leiding van die Heilige Gees of jy oor sommige vrae net ligweg moet gaan en of jy dit geheel en al moet oorslaan, veral as jy van 'n sensitiewe

kwessie in iemand se lewe bewus is (soos 'n aborsie, misbruik, huweliksontrou, ensomeer) wat pynlike herinneringe kan wakker maak as dit bespreek word. As pynlike sake wel na vore kom, lê klem op God se genade, vergifnis en begeerte om te herstel, en om vir elkeen 'n nuwe lewe te gee wat moontlik is in Christus.

- Elkeen moet die vertroulikheid van die groep respekteer. Persoonlike inligting wat met die groep gedeel word, moet binne die groep bly.
- Hierdie studie vereis nie huiswerk of buitemuurse aktiwiteite nie. Groeplede mag natuurlik tuis die Bybel verder lees en bestudeer en bykomende hulpbronne gebruik om antwoorde op vrae te soek vir opvolgbesprekings, veral ten opsigte van taai vrae wat moeilik is om te antwoord.
- As groepleier het jy nie al die antwoorde nie. As groep kan julle ontdek dat daar op sekere vrae nie 'n klinkklare antwoord bestaan nie. Neem kennis dat die Bybel nie antwoorde op al ons vrae het nie, maar gee vir ons genoegsame inligting om te weet wie God is en waarom God 'n gesonde verhouding met ons wil hê.
- Julle is almal deel van die groep om te hoor wat die Bybel sê en nie om te stry oor wat reg en verkeerd is nie. Sommige van die vrae kan moontlik nie 'n absolute regte antwoord hê nie en kundiges sal dikwels verskil oor die interpretasie van 'n gedeelte wat moeilik is om te verstaan. Onthou dat die oordra van die hoofgedagtes en begrippe die belangrikste is.
- Vermy dit dat besprekings van die spoor dwaal of verdeelheid bring. Leer ken jou groeplede en die interaksie tussen mekaar.

Wees bedag op vrae (veral by die gedeeltes

**Wat beteken dit vir my vandag?**) of

onderwerpe wat sommige groeplede kan gebruik om politieke agendas of kontroversiële kwessies voorop te stel en te bevorder. Indien daar wel verdelende kwessies na vore kom, moedig die groep aan om mekaar se opmerkings te respekteer en om na die Heilige Gees op te sien vir gesamentlike leiding. Dit sal miskien die beste wees om dan na die volgende vraag of Skrifgedeelte te gaan om almal te help om op die les te gefokus te bly. Indien dit nodig is, kan jy later met die groeplede vergader wat sterk menings mag hê en hulle vriendelik aanmoedig om tydens die besprekings op die Skrifgedeeltes en Bybelstudie te fokus.

- Baie van die vrae (veral in **Wat beteken dit vir my vandag?**) is bedoel om groeplede te help om die gedeelte persoonlik toe te pas. Bybelstudie is nie bloot net 'n intellektuele oefening waartydens ons ons oor fassinerende inligting oor die Bybel verwonder nie. Dit is 'n geleentheid vir die Here om ons te leer en met ons persoonlik en as gemeenskap te praat deur die krag van sy Heilige Gees. Ons moet, met ander woorde, nie net inligting ontvang nie, maar ons moet verander word. Die uiteindelijke doelwit van Bybelstudie is om mense te help om in hulle verhouding met God, met mekaar, met ander in die wêreld en met die wêreld wat God geskep het te groei.

## Notas vir die lesse

### Les 1

Die bespreking van Ahasveros se mishandeling van Vasti en die idee van 'n harem vol vroue vir seksuele gebruik, kan herinneringe van mishandeling of verkragting by iemand in jou groep laat opkom wat hieronder gelyk het. Wees voorbereid om met deernis en sensitiwiteit te reageer en 'n ander persoon se pyn te erken. Alhoewel mishandeling nie die hoofgedagte van hierdie sessie is nie, kan hierdie onderwerp nie vermy word wanneer dit na vore kom nie. Jy kan as leier aanbied om later oor middagete of koffie met 'n groeplid te ontmoet wat moontlik met mishandeling worstel. Wees ook voorbereid om die persoon na 'n professionele berader te verwys en help om 'n afspraak te maak. Die gevolge van mishandeling kan tot 'n lewenslange disfunksie lei as dit nie hanteer word nie.

### Les 3

Vra die groeplede of hulle tyd gehad het om van die leesstukke by **Stilwoordtyd** te lees. As hulle nie het nie, moedig hulle aan om een of twee van die leesstukke te lees as opvolgtyd saam met die Here in die komende week.

### Les 4

Julle is nou halfpad deur die Bybelstudie. Hoe ervaar die groep dit? Dink as groepleier na oor die hoofdoelwit: “om nader aan God en aan mekaar te groei, om in die geloof gebou te word sodat elkeen ook geestelik kan groei om 'n getuie vir die Here te wees (Hand 1:8) – en so God se liefde en die evangelie met ander te deel.” Miskien ondervind jy dat dieselfde

persoon of persone bydra tot die besprekings in die groep. As groepleier moet jy probeer om gedagtes of antwoorde van die stiller lede van die groep op 'n veilige en niebedreigende manier te ontlok.

Hierdie les bring die optrede van Ester na vore. Dit eindig met 'n verrassende draai van gebeure toe Mordegai vereer word vir wat hy in die verlede gedoen het. Maak seker dat jy deur die gebeure en feite wat aangebied word, die immer teenwoordige werking van die Here in die agtergrond uitwys. As jou groeplede nuut is ten opsigte van die Bybel en nie noodwendig in die Here glo nie, kan 'n persoonlike verhaal uit jou lewe hulle help om te sien hoe jy die werking van die Gees in 'n moeilike tyd ervaar het. Dit is goed om te erken dat daar soms tye is wanneer 'n mens ervaar dat God stil is en die pad vorentoe donker lyk. Ons kan egter uit die verhaal van Ester sien dat die Here wel daar is. Dit kan 'n bemoediging wees vir iemand wat dalk 'n moeilike tyd beleef.

Vir diegene wat nie met die Bybel vertrou is nie, kan die hoofstukke en versnommers verwarrend wees en hulle laat glo dat 'n mens die verhaal van Ester in kleiner dele moet opbreek en afsonderlik lees. Jy kan aan die groeplede voorstel dat hulle die hele boek Ester in *Die Boodskap* (by [www.bybelmedia.co.za](http://www.bybelmedia.co.za) of by CUM-boekwinkels of ander toonaangewende boekwinkels te koop) lees of in die Engelse weergawe *The Message* (deur Eugene Peterson) wat op die internet beskikbaar is by [www.biblegateway.com](http://www.biblegateway.com). In *Die Boodskap* of *The Message* word die verhaal in alledaagse Afrikaans en Engels aangebied en lees dit gemaklik as 'n enkel verhaal.

Hoe gaan dit met jou en jou groep ten opsigte van die **Stilwordtyd** en die leesstukke? Dit is nie bedoel vir groeibesprekings nie, maar as julle ekstra tyd aan die einde van julle byeenkoms het, kan jy dalk vra of iemand 'n gunstelingstuk van die afgelope week het en waarom.

Die hamantaschen-resep is pret om te maak en sal vir jou groep die geleentheid gee om die Joodse kultuur op 'n ander vlak te ervaar. Dit is in elk geval pret om eetgoedjies met mekaar te deel en te geniet.

## Les 5

By vraag 8 gaan dit oor die saak dat mense van geloof (kan) verander. Indien jy aanvoel dat enige van jou groeplede gereed is om sy of haar lewe aan die Here toe te wy, nooi hulle uit om later saam met jou te bid en om so God se liefde en genade te ontvang vir 'n nuwe lewe in Christus. Jy kan **'n Uitnodiging** en **'n Toewydingsgebed** aan die einde van die Bybelstudieboek gebruik om jou hiermee te help.

Jy moet as groepleier jou daarop voorberei dat sommige mense onsteld sal raak oor die paalstraf, hang van mense, bloeddorstige gevegte en so meer wat in die Bybelgedeeltes vir hierdie les en die volgende een genoem word. Dit is vir baie van ons moeilik om vanuit ons kultuur vandag te probeer om te verstaan in watter tye Ester en Mordegai geleef het. Maar dit beteken nie dat ons dit moet vermy om oor hierdie dinge te praat en dit te bestudeer nie. Luister op 'n sensitiewe manier na groeplede se kommentaar en probeer om dit saaklik te verduidelik. Erken daarmee saam dat ons in

'n gebroke wêreld leef waar verskriklike geweld steeds voorkom. Ons sien met verlange uit na die wederkoms van Christus en wat belowe: “Die dood sal daar nie meer wees nie. Ook leed, smart en pyn sal daar nie meer wees nie” (Op 21:4).

Weer eens, as dit nodig is, stel vas by die groeplede (miskien persoonlik) om te hoor of hulle gebruik maak van die leesstukke by **Stilwordtyd** as opvolgtyd met die Here. Wys op die voordele daarvan om dikwels deur die week 'n stil en persoonlike oomblik met die Here deur te bring. Vertel van jou eie ervarings van Bybelstudie, gereelde kontak met die Here deur daaglikse gebed en nadenke, om 'n gebedsjoernaal te hou, ensovoorts.

# Bykomende hulp om lesse aan te bied

Ons hoop dat jy die hulpmiddels op die volgende bladsye nuttig kan gebruik wanneer jy die Bybelstudie aanbied en lei. Jy het toestemming om dit in die groep uit te deel soos wat dit nodig is – tot voordeel van elkeen se ervaring van 'n kleingroepstudie.

- Grondreëls vir Bybelstudie in 'n kleingroep
- “Om die Bybel reg te lees” deur Al-Attas Bradford en Mary Hulst, afgedruk met die toestemming van Faith Alive Christian Resources.

# Grondreëls vir Bybelstudie in 'n kleingroep

Ons kom ooreen om ...

- na mekaar te luister en vir elkeen geleentheid te gee om te praat.
- mekaar se bydraes te respekteer, mekaar op te bou en om na die Heilige Gees op te sien om ons te lei.
- oop te wees om by mekaar te leer.
- openlik ons ervarings met mekaar te deel soos wat ons gemaklik daarmee voel, terwyl ons mekaar se reg op privaatheid erken en om stil te bly.
- eenkant-besprekings en onnodige onderbrekings te vermy.
- besprekings wat van die spoor afdwaal of verdeling skep te vermy.
- die vertroulikheid van die groep te respekteer. (Wat ons in die groep vertel of sê bly in die groep.)

Ons erken dat ...

- niemand al die antwoorde het nie en dat sommige vrae nie bevredigende antwoorde het nie. Die Bybel gee egter steeds vir ons genoegsame inligting om te weet wie God is en waarom die Here 'n gesonde verhouding met elkeen van ons wil hê.
- Ons almal hier is om te ervaar wat die Bybel te sê het. Ons doelwit is om die hoofgedagtes

en begrippe te leer ken sodat ons dit in ons lewe kan toepas en die Here beter kan leer ken.

- Ons wil ons afvra: *Wat is die belangrikste ding wat die Here hier vir ons leer en wat beteken dit vir ons alledaagse lewe?*

# Om die Bybel reg te lees

deur Aminah Al-Attas Bradford en Mary Hurst

**V**erlede week het 'n kollega by ons kantoor ingelooop en gevra: “Presies hoe belangrik is dit om die Bybel te lees?” Die reaksie: “Dit hang alles daarvan af hoeveel jy hoop om verander te word!”

Ons het ook vir ons kollega gesê dat die voorwaarde vir verandering daarmee saamhang dat sy die Bybel *reg* moet lees. Die gedagte om die “Bybel reg te lees” het tot 'n langer gesprek oor Bybelse interpretasie en die gereformeerde benadering daartoe gelei.

Die gesprek het toe verskuif na die wysheid van *Star Trek: The Next Generation*. Data, een van die karakters van die reeks, is 'n produk van kunsmatige intelligensie wat geen emosies het nie. Data lag nooit vir enige grap wat op die ruimteskip Enterprise vertel word nie omdat hy slegs dinge letterlik kan interpreteer. Vanweë sy letterlike benadering tot alles, verstaan Data nie humor nie, kan hy nie sinspelings of idiome identifiseer nie en mis hy dikwels heeltemal die punt van 'n gesprek of ontmoeting. Ons het daarop gewys dat 'n letterlike interpretasie soms tot 'n verkeerde interpretasie of weg van die waarheid lei.

Nadat ons ons kollega oortuig het dat goeie interpretasie van die Bybel wel noodsaaklik is, het ons gesprek begin gaan oor hoe 'n mens die

Bybel reg lees. Ons het op twee werklikhede klem gelê: Eerstens, die boeke van die Bybel is geskryf in spesifieke tye en plekke, en tweedens, daardie boeke verteenwoordig 'n verskeidenheid literêre genres.

## 'n Brug oor die historiese kloof

Die boeke van die Bybel kom uit spesifieke tye en plekke. Sommige boeke kom uit tye meer as 3 500 jaar gelede. Dit beteken nie dat die Bybel nie vir vandag iets te sê het nie. Die Bybel openbaar aan ons waarhede heeltemal relevant is vir ons lewe vandag. Maar hierdie waarhede kom na ons vanuit historiese en kulturele situasies.

Die Here het menslike woorde in menslike geskiedenis gebruik om aan ons ewige waarhede te gee. As ons dus wil weet wat 'n teks vandag beteken, moet ons eers ons bes doen om vas te stel wat dit toe vir lesers beteken het.

Dink aan Paulus se waarskuwing aan vroue om nie gevlegte hare te dra nie (1 Tim 2:9). Was dit sy bedoeling om vlegsels, poniesterte en Rastalokke vir miljoene jare wat sou kom te verbied? Nee. Sy punt was dat in daardie spesifieke tyd en plek vlegsels 'n teken van welvaart was waarmee nie in die kerk gespog



moes word nie. Die tydlose waarheid dat Christene nie met hulle rykdom tydens 'n erediens te koop moet loop nie, is beliggaam in 'n historiese omstandigheid. Deur vas te stel wat Paulus se woorde vir Christene van die eerste eeu beteken het, help ons om vas te stel wat dit nou vir ons beteken.

Om die historiese kloof na die verlede oor te steek tussen die Bybel, toe en nou, beteken om goeie vrae te vra oor die historiese en kulturele konteks van die Skrifgedeeltes wat gelees of bestudeer word. Vrae soos:

- Wanneer is dit geskryf?
- Wat het toe in die wêreld gebeur?
- Wie het dit geskryf?
- Aan wie is dit geskryf?

Die maklikste manier om hierdie om hierdie soort inligting of interpretasie te kry is om 'n goeie studiebybel te kry. Hierdie tipe inligting word gewoonlik ingesluit aan die begin van elke Bybelboek. Dit is ook die geld werd om 'n goeie “Inleiding tot die Bybel” of Bybel-ensiklopedie te koop. Deur hierdie hulpbronne dikwels te raadpleeg terwyl jy jou Bybel lees, kan jy ook antwoorde op die vrae hier bo kry.

Deur antwoorde op vrae vanuit die historiese konteks te beantwoord help 'n mens om beter te verstaan wat die teks vir die vroegste lesers mag beteken het en daarom wat dit vir ons vandag beteken.

Terwyl 'n mens die Bybel lees, is dit goed om te onthou dat die Woord in elke opsig volmaak is soos wat God wil hê dit moet wees. Dit mag dus

wees dat sommige van die historiese feite en besonderhede van gedeeltes vir ewig verlore is, maar ons vertrou dat die Here in sy voorsienigheid gekies het om sy verhaal op hierdie manier aan ons te openbaar. Die feit dat misterie en vrae altyd deel van die Bybel sal wees wanneer ons dit lees, is nie as gevolg van die feit dat die Here nalatig was toe Hy sy Woord aan ons gegee het nie.

Miskien het Gregorius van Nyssa (Nyssa was 'n dorp in Kappadosië, waar hy 'n biskop was; hy het tussen 335 – 395 geleef) iets hiervan bedoel toe hy geskryf het: “Konsepte skep afgode – net verwondering bring begrip.” Die Bybel is minder daarop ingestel om vir ons waterdigte argumente te gee as om aanbidding en verandering by ons te ontlok. Dit is waar dat sonder om iets van die historiese konteks van die Bybel te verstaan, jy waarskynlik die Bybel nie reg sal interpreteer nie. Maar terselfdertyd moet jy onthou dat enige misterie waarmee jy gelaat word, nie 'n fout aan die kant van die Bybel is nie, maar 'n uitnodiging.

## **Kies 'n genre**

Afgesien van die aspek van die historiese konteks van die Bybel, moet ons – wanneer ons die Bybel lees – rekening hou met die feit dat die Bybel 'n versameling van boeke is wat in verskillende genres geskryf is. As die Bybel slegs bestaan het uit stellings wat iets voorstel of aanbied om te oorweeg of te aanvaar of te doen, sou 'n letterlike interpretasie die aangewese weg wees. Maar die Here gee aan ons sy waarheid deur 'n aantal genres soos poësie, liedere, briewe en verhale – wat beteken dat ons moet

leer hoe om te interpreteer afhangende van die soort genre wat ons lees.

'n Spreuk verskil byvoorbeeld van 'n belofte. “Gee leiding aan 'n jongmens oor hoe hy moet leef, en hy sal ook as hy al oud is nie daarvan afwyk nie” (Spr 22:6) is 'n riglyn en nie 'n waarborg nie. 'n Gedig wat sê dat God “die aarde ruk, weg van sy fundamente af, en sy pilare bewe” (Job 9:6), is nie bedoel as 'n handboek oor die geologie nie. En om 'n brief te lees is soos om iemand anders se korrespondensie te lees sonder dat jy die hele heen-en-weer-korrespondensie wat dit vooraf gegaan het voor jou het – “Ek vermaan vir Euodia en ek vermaan vir Sintige om eengesind te wees in die Here” (Fil 4:2). Onthou om jousef af te vra: “Watter genre lees ek nou?” Dit lê die fondament vir goeie interpretasie.

## **Lees met die geheel in gedagte**

Net so belangrik soos wat dit is om te onthou dat die Bybel 'n versameling van afsonderlike boeke is, vereis goeie interpretasie ook om die Bybel as een groot boek te sien.

Aangesien die kerk van Jesus Christus glo dat die God die skrywer is van die Bybel en dat die Heilige Gees die proses van die kanonisering (die keuse om te besluit watter boeke deel van die Bybel vorm) van die Bybel gelei het, vind ons die waarheid nie net afsonderlik in elkeen van die Bybelboeke nie, maar ook in die kanon as geheel.

Daar is per slot van rekening 'n oorkoepelende boodskap of verhaallyn wat deur die hele Bybel

geweef is. Dit begin met die skepping en die sondeval en beweeg aan tot by die verlossing en die wederkoms, die vervulling van God se plan.

Die boodskap van die Bybel kry ons in die verhaal van God wat skep en red en uiteindelik sy koninkryk op aarde openbaar. Dit word gevind in die belofte van Jahweh wat deur die geskiedenis beweeg in die Persoon van Jesus Christus om alles wat stukkend is te neem en dit heel te maak. Ons interpretasie moet nooit in konflik wees met die groot verhaal van die Bybel nie. 'n Gesonde manier van Bybellees beteken dat jy jou interpretasie teen hierdie deurlopende verhaallyn moet toets. Met ander woorde, die Bybel moet die Bybel self interpreteer.

## **Dit gaan nie oor jou nie**

Om die Bybel reg te lees is nie bloot 'n uitwendige oefening nie. Eerstens neem ons die aard van die Bybelteks in ag en interpreteer dat elke gedeelte op grond van die historiese konteks en die genre waarin dit geskryf is.

Maar tweedens moet ons ook in ag neem hoe ons is. Dit is die verskil tussen om te lees om inligting te kry en om te lees met die oog daarop om te verander.

Te dikwels verwag ons van die Bybel om iets te wees wat dit nie is nie. Ons gaan lees die Bybel vir wenke om 'n Christelike huwelik te onderhou. Ons vra die Bybel om 'n handleiding vir ouers te wees of ons vra dit om vir ons te sê hoe om die regte werk, die regte universiteit of die regte huis te kies. As ons egter die Bybel reg wil interpreteer, *moet ons die vrae vra wat dit veronderstel is om te antwoord.*

Byvoorbeeld, kom ons neem die skepping in Genesis 1. Christene het vir lank daardie gedeelte gebruik om te argumenteer oor *wanneer* en *hoe* die wêreld geskep is. Maar daardie gedeelte was nooit bedoel om antwoorde op hierdie vrae te gee nie. Die historiese en kulturele konteks van Genesis 1 dui daarop dat die skeppingsverhaal gskryf is om Israel (en nou vir ons) te help om antwoorde te vind op die vrae *wie* die wêreld geskep het en *waarom*.

Dit gaan daarom dat ons sowel die swart as die wit dele van die teks moet lees. Ons moet wat in swart gedruk is, lees, maar ook die leë wit spasies op die bladsy. Dit beteken dat ons moet ag slaan op wat *nie* in die Bybelteks geskryf is nie en die teks toelaat om stil te wees waar dit wil.

Op dieselfde manier moet ons weet dat die Bybel nie 'n Magic 8-Ball is wat ons eenvoudig kan skud en vir antwoorde vra nie. Augustinus herinner ons dat ons ons eie toestand en neigings in gedagte moet hou wanneer ons die Bybel lees.

Augustinus het die Bybel vergelyk met 'n kamer met 'n baie lae deur. So groot en wonderlik en indrukwekkend soos wat die Bybel is, moet ons gewillig wees om onself te verneder en laag op die grond te buig as ons die wysheid van die Bybelteks wil binnegaan.

Dit beteken dat ons die Bybel toelaat om ons te verras – ons gaan nederig in sonder vooropgestelde antwoorde. In die prediking kom dit na vore in 'n prediker wat die teks toelaat om die preek te bepaal, eerder as om sy of haar

vooropgestelde idees toe laat om die teks te dwing om iets te sê wat dit nie is nie (tematiese prediking val dikwels in hierdie kategorie). Net soos wat ons predikers wil hê wat die teks toelaat om te spreek, wil ons so 'n nederigheid beoefen wanneer ons die Bybel by onself lees.

Een van die maniere om te weet of jy die Bybel oop en in nederigheid lees, is om te kyk of die Here jou siening van wie God is en wie ons is, verander. Indien die Bybel in werklikheid “lense van geloof” is soos Calvyn dit genoem het, dan moet dit ons siening van die wêreld verander. Wanneer jy 'n bril opsit, weet jy die bril doen sy werk wanneer dit wat jy sien verander. Wanneer jy die Bybel lees en dit geen impak op hoe jy die dinge rondom jou sien nie – soos gesondheid, seksualiteit, huwelik, geld, hoe jy jou tyd spandeer, sonde, genade – dan is dit 'n teken dat jou lens (die manier waarop jy die Bybel lees) nie die soort impak of gesag het wat dit behoort te hê nie.

Om met nederigheid te lees beteken nie om na die Bybel te gaan om jou eie idees oor God te laat bevestig nie, maar eerder om God te vra om ons gedagtes deur sy Woord te vorm. Oorweeg dit om die Here te vra om hierdie jaar jou siening van een ding te verander.

## **Lees saam met ander**

Voordat gelowiges elkeen hulle eie persoonlike eksemplaar van die Bybel gehad het, is die Bybel slegs by tye in groepe gelees en gehoor. Dit bly 'n uitstekende manier om die Woord van die Here opnuut te hoor.

Ons is geneig om dinge anders te hoor wanneer ons die Bybel saam met ander lees. 'n Medegelowige kan jou opskerp vir iets wat jy in die teks gemis het.

As jy regtig seker wil maak dat jy nie net interpreteer op 'n manier waardeur jy alles wat jy reeds glo net bevestig nie, is dit nog beter om die Bybel saam met mense te lees wat nie dieselfde as jy is nie. Soek ouer of jonger mense, ryker of armer, meer stedelik of plattelands as jy. Soek mense van 'n ander etniese afkoms as jy of 'n ander politieke party as jy of 'n ander kerkgenootskap as jy en lees saam met hulle die Bybel!

## **Bid eers**

Ons sluit af met die belangrikste ding: bid eers. Wanneer jy gaan sit om te lees – in die oggend voor jou ontbyt, om die eettafel saans met jou gesin, in die stilte van jou kantoor, met vriende oor koffie – nooi die Heilige Gees om jou te lei. Bid dat jy sal hoor wat die Here wil sê, dat die Gees gedagtes wat nie van die Here af is nie, sal uitroei en dit met die lewenskragtigheid van die lewende Woord sal vervang. Bid vir insig, vir raad, vir troos, vir waarheid, maar bid veral dat jy verander sal word.

**Aminah Al-Attas Bradford** is 'n deeltydse kapelaan vir die inwoners van die Calvin Collge, Grand Rapids, Michigan in die VSA.

**Dr Mary S Hulst** is die kollege-kapelaan vir van die Calvin College en assistent-professor van Homilietiek by die Calvin Theological Seminary, Grand Rapids, Michigan in die VSA.